



PLANINARSKI SAVEZ FEDERACIJE BOSNE I HERCEGOVINE
MOUNTAINEERING UNION OF FEDERATION BOSNIA AND HERZEGOVINA

Mula Mustafe Bašeskije 63 - TC 'Nove Daire', 71 000 Sarajevo, Bosna i Hercegovina
tel.: +387 (0) 33 55 56 86, fax: +387 (0) 33 55 56 85, e-mail: psbih1@bih.net.ba

PRAVILNIK
KOMISIJE ZA ALPINIZAM
PLANINARSKOG SAVEZA FEDERACIJE BOSNE I HERCEGOVINE

Broj: 153-12/17.

9. DECEMBAR 2017.

www.psbih.ba



Na osnovu člana 29. Statuta Planinarskog saveza Federacije Bosne i Hercegovine, Upravni odbor na svom zasjedanju dana 9.12.2017. godine donosi:

**PRAVILNIK
KOMISIJE ZA ALPINIZAM
PLANINARSKOG SAVEZA FEDERACIJE BOSNE I HERCEGOVINE**

OPĆI DIO

Član 1.

Komisija za alpinizam Planinarskog saveza Federacije Bosne i Hercegovine (u daljem tekstu Komisija) brine se o razvoju alpinizma i koordinira cjelokupnu alpinističku aktivnost na području BiH u okviru planinarske organizacije, planira i organizuje alpinističke ekspedicije, organizuje stručna predavanja i surađuje sa međunarodnim alpinističkim udruženjima, federacijama i unijama.

Član 2.

Komisija je počela da radi na polju alpinizma od oktobra 1949. godine pod nazivom Komisija za alpinizam i pećinarstvo Planinarskog saveza BiH, kada je na tečaj na Prenj planinu uputila četiri svoja člana.

Član 3.

Komisija radi po općem Pravilniku o radu komisija Planinarskog saveza Federacije Bosne i Hercegovine broj 84-04/16 od 19.12.2015. godine.

Član 4.

Komisija ima svoj znak – amblem. Znak je u obliku kruga na čijem rubu piše PSBiH i ALPINISTA, u sredini se nalazi bijela planina sa zlatnim runolistom na svijetlo plavoj podlozi. Znak se koristi isključivo zajedno sa znakom Planinarskog saveza.

CILJEVI

Član 5.

Ciljevi Komisije su širenje i razvijanje alpinizma u Bosni i Hercegovini, osposobljavanje za alpinističke aktivnosti, dodjeljivanje stručnih alpinistička zvanja i organizovanje alpinističkih ekspedicija.

Član 6.

Ostvarivanje ciljeva iz člana 5. ovog pravilnika Komisija provodi na sljedeće načine:

- Širi i razvija alpinističku aktivnost u okviru planinarske organizacije
- Vodi evidenciju o stručnom kadru
- Organizuje kurseve, tečajeve, seminare i druge vidove stručnog usavršavanja
- Donosi program alpinističkog školovanja
- Organizuje ispite za kandidate koji su stekli uslove za polaganje i sticanje alpinističkih zvanja



- Definiše norme alpinističke djelatnosti (klasifikacija uspona, discipline i stilovipenjanja, načini ocjenjivanja uspona)
- Donosi sigurnosne norme u alpinizmu
- Organizuje alpinističke ekspedicije
- Organizuje ili sudjeluje u organizaciji aktivnosti poput logora i seminara
- Vodi evidenciju pripravnika, alpinista i instruktora alpinizma u PS FBiH
- Određuje kriterije za klasifikaciju ekspedicija
- Saraduje sa međunarodnim alpinističkim udruženjima
- Saraduje sa drugim stručnim komisijama u PS FBiH
- Saraduje sa gorskom službom spašavanja
- Informiše o svojim aktivnostima putem printanih i elektronskih medija
- Brine o sigurnosnim pitanjima alpinističke djelatnosti u PS FBiH,
- Zastupa alpiniste u međunarodnim i domaćim udruženjima

ČLANSTVO

Član 7.

Alpinistička zvanja su:

- Pripravnik za alpinizam
- Kandidat za alpinistu (predzvanje)
- Alpinista
- Asistent alpinističke škole
- Kandidat za instruktora alpinizma (predzvanje)
- Instruktor alpinizma

PRIPRAVNIK ZA ALPINIZAM

Član 8.

Pripravnik za alpinizam je svaki član alpinističke sekcije (odsjeka/kluba) koji ispunjava sljedeće uslove:

- da je član Planinarskog saveza FBiH
- da je aktivan član u matičnoj alpinističkoj sekciji ili organizaciji
- da je navršio 16 godina, uz pismenu saglasnost roditelja (ako je mlađi od 18 godina)
- da ima otvoren lični alpinistički karton
- da je uspješno završio alpinističku školu prema programu školovanja Komisije

KANDIDAT ZA ALPINISTU

Član 9.

Kandidat za alpinistu je pripravnik za alpinizam koji je ispunio posebne uvjete iz kriterija za sticanje zvanja alpinista, te podnio prijavu za polaganje završnog ispita za alpinistu.



ALPINISTA

Član 10.

Alpinista može postati svaki pripravnik za alpinistu koji ispunjava sljedeće uslove:

- da je član Planinarskog saveza FBiH
- da je navršio 18 godina
- da je izvršio uspon na Maglić, najviši vrh Bosne i Hercegovine
- da je izvršio najmanje 30 različitih alpinističkih uspona u vodstvu ili naizmjenično na pet različitih gorja, od čega je obavezno:
 - izvršeno najmanje 10 ljetnih smjerova težine V stepena i više, sa ukupnom dužinom preko 150 metara
 - izvršeno najmanje 5 zimskih uspona, najmanje visine 200 metara, od kojih 3 sa izlazom na vrhove preko 2000 metara
 - izvršen zimski uspon na Lupoglav
 - izvršen najmanje jedan uspon u zaleđenom slapu ili ledopadu, a ukoliko se nisu formirali ledopadi u periodu sticanja uslova kao alternativa se prihvata zimsko ponavljanje u stijeni sjeverne orijentacije (sz – s – si) po slobodnom izboru
- da je izvedena najmanje jedna skijaška dvodnevna skijaška tura sa bivakom
- obavezno asistiranje na ljetnoj i zimskoj školi alpinizma, tokom kojih povremene demonstracije po izboru i odluci vođe škole
- da ima uredno vođen i ovjeren lični alpinistički karton
- da ima položen stručni ispit za alpinistu pred ispitnom komisijom.

ASISTENT ALPINISTIČKE ŠKOLE

Član 11.

Asistent alpinističke škole je osoba koja radi kao demonstrator ili pomoćnik na alpinističkim školama. To mogu biti kandidati za alpinistu i alpinisti.

KANDIDAT ZA INSTRUKTORA ALPINIZMA

Član 12.

Kandidat za instruktora alpinizma je alpinista koje je ispunio posebne uvjete iz kriterije za sticanje zvanja instruktor alpinizma te podnio prijavu za polaganje završnog ispita za instruktora alpinizma, a ima pravo i obavezu da radi na alpinističkim školama kao asistent. Kandidat za instruktora alpinizma je alpinista koji ima pisanu preporuku instruktora alpinizma za stažiranje na školama/tečajvima alpinizma.

INSTRUKTOR ALPINIZMA

Član 13.

Instruktor alpinizma može postati alpinista koji ispunjava sljedeće uslove:

- da je član Planinarskog saveza FBiH
- da nije mlađi od 21 godine



- da je u zvanju registrovani alpinista proveo aktivno najmanje 3 godine
- da je aktivno učestvovao u najmanje tri alpinističke škole u organizaciji PS FBiH kao kandidat za instruktora alpinizma i učestvovao u radu tečaja kao demonstrator i teoretski predavač. Komisija potvrđuje rad na školi/tečaju tako što navodi spisak kandidata za instruktore u izvještaju nakon završene škole/tečaja
- da ima pisanu preporuku instruktora, vođe tečaja sa kojim je izvodio obuku
- da je pratio novine UIAA, te da u tri godine pred polaganje prisustvuje jednom (1) seminaru u organizaciji Komisije za alpinizam
- da je napisao seminarski rad
- da je položio teorijski i praktični ispit koji je organizovala ispitna komisija po programu odobrenom od strane Komisije za alpinizam.

Član 14.

Ispitnu komisiju za alpinistička zvanja sačinjavaju 3 instruktora alpinizma koju imenuje Upravni odbor Planinarskog saveza FBiH. U nedostatku instruktora, komisiju za alpinistička zvanja mogu činiti 2 instruktora alpinizma i 1 instruktor druge specijalnosti. Ispitna komisija radi po programu školovanja koji donosi Komisija.

Član 15.

Dodjeljivanje zvanja pripravnik za alpinizma se potvrđuje diplomom nakon završene škole/tečaja u organizaciji Planinarskog saveza FBiH. Zvanje asistent i kandidat za instruktora alpinizma donosi vodstvo alpinističke škole, a Komisija ga potvrđuje tako što navodi u izvještaju nakon završene škole/tečaja u organizaciji Planinarskog saveza FBiH.

Odluku o dodjeljivanju zvanja alpinista i instruktor alpinizma dodjeljuje Upravni odbor PS FBiH na osnovu zahtjeva Komisije za alpinizam i uspješno položenog praktičnog i teoretskog ispita pred ispitnom komisijom.

Član 16.

Za zvanje alpinista, PS FBiH izdaje diplomu i značku. Značka je okrugla i po rubu piše PSBiH i ALPINISTA, u sredini se nalazi bijela planina sa zlatnim runolistom na svijetlo plavoj podlozi. Znak se koristi isključivo zajedno sa znakom Planinarskog saveza.

ALPINISTIČKE EKSPEDICIJE

Član 17.

Komisija uspostavlja principe efikasnog organizovanja i realizovanja ekspedicija u planinarskoj organizaciji, doprinosi unapređenju uslova važnih za ekspedicionizam, te organizuje i realizuje ekspedicije na nivou PS FBiH.

Komisija prati alpinističke ekspedicije širom svijeta i upoznaje članove putem informacija, savjetovanja i seminara.

Komisija analizira, iskustveno podržava, preporučuje i pomaže organizaciji ekspedicija, uključujući i angažman u obezbjeđenju finansijskih sredstava za realizaciju ekspedicije.

Član 18.



Ekspedicije se klasificiraju na osnovu zahtjevnosti učešća u istim, te u smislu ostvarivanja sportskog rezultata.

Komisija podržava sve ekspedicije planinarske organizacije, na svim nivoima, koje su u skladu s Kriterijima za klasifikaciju ekspedicija, koje donosi Komisija.

Ekspedicije koje ne zadovoljavaju propisane kriterije komisije, mogu biti klasificirane kao ekspedicije pojedinog planinarskog društva.

Član 19.

U općem smislu, ekspedicije se dijele na ekspedicije od značaja za društvo, regiju (kanton), razvoj planinarstva, te nacionalnog i međunarodnog značaja.

U skladu s prethodnim stavom, ekspedicije mogu biti:

- ekspedicije planinarskog društva (kluba)
- regionalne (kantonalne)
- kadrovske
- nacionalne i
- ekspedicije međunarodnog reda

Ekspedicije koje pomjeraju granice u svjetskom alpinizmu, smatraju se ekspedicijama međunarodnog reda (ranga).

ZBOR ALPINISTA

Član 20.

Zbor alpinista (u daljnjem tekstu: Zbor) je skup svih alpinista i instruktora alpinizma PS FBiH na kojem se donose prijedlozi za glavne smjernice alpinističke djelatnosti u PS FBiH za višegodišnji period.

Član 21.

Komisija saziva Zbor prema potrebi, a najmanje jednom u dvije godine.

Član 22.

Zborom predsjedava predsjednik Komisije, a u njegovoj odsutnosti zamjenik, a u njihovoj odsutnosti opunomoćeni član Komisije, a u njihovoj odsutnosti prisutni članovi Komisije među sobom biraju predsjedavajućeg člana.

Član 23.

Zbor odlučuje natpolovičnom većinom glasova. Pravo glasa pri odlučivanju na Zboru imaju samo sudionici zbora sa zvanjem instruktor alpinizma i alpinist.

Član 24.

Ovaj Pravilnik stupa na snagu danom donošenja i objavljivanja.

Predsjednik PSFBiH
Zehrudin Isaković